



**TERENGGANU DARUL IMAN
TAMBAHAN PERUNDANGAN**

AKTA KERAJAAN TEMPATAN, 1976

**Tr. P.U. 15/88
UNDANG-UNDANG KECIL KEDAI GUNTING RAMBUT
DAN PENDANDAN RAMBUT
(MAJLIS DAERAH SETIU) 1988**

Tarikh penyiaran:
Tarikh mula berkuatkuasa:

15 Disember 1988
15 Disember 1988



TERENGGANU DARUL IMAN
TAMBAHAN PERUNDANGAN
AKTA KERAJAAN TEMPATAN 1976

Tr. P.U. 15/88

UNDANG-UNDANG KECIL KEDAI GUNTING RAMBUT DAN PENDANDAN RAMBUT
(MAJLIS DAERAH SETIU) 1988

Tarikh penyiaran:

15 Disember 1988

Tarikh mula berkuatkuasa:

15 Disember 1988

SUSUNAN UNDANG-UNDANG KECIL

Mukadimah

- Undang-undang kecil 1. Nama, pemakaian dan mula berkuatkuasa.
Undang-undang kecil 2. Tafsiran.
Undang-undang kecil 3. Lesen, bayaran dan pemeriksaan.
Undang-undang kecil 4. Kebersihan premis dan perkakas.
Undang-undang kecil 5. Bekalan air panas dan sejuk.
Undang-undang kecil 6. Bekas bagi tuala kotor dan buangan tred.
Undang-undang kecil 7. Kehendak-kehendak kebersihan yang mesti dipatuhi oleh pendandan rambut.
Undang-undang kecil 8. Tuala muka yang bersih dan lain-lain untuk seorang pelanggan.
Undang-undang kecil 9. Sabun untuk cukuran.
Undang-undang kecil 10. Cawan cukuran.
Undang-undang kecil 11. Penggunaan span di larang.
Undang-undang kecil 12. Memberhentikan keluaran darah.
Undang-undang kecil 13. Penyakit-penyakit berjangkit atau menular.
Undang-undang kecil 14. Membasmikan kuman dari alat-alat.
Undang-undang kecil 15. Meludah.
Undang-undang kecil 16. Binatang dilarang masuk.
Undang-undang kecil 17. Penalti.
Undang-undang kecil 18. Salinan undang-undang hendaklah dipamerkan dalam kedai gunting rambut.

Mukadimah

PADA menjalankan kuasa-kuasa yang diberi oleh seksyen 102 Akta Kerajaan Tempatan 1976 [Akta 171], Majlis Daerah Setiu membuat dan menurut seksyen 103 Akta tersebut Pihak Berkuasa Negeri mengesahkan, undang-undang kecil yang berikut:

1. Nama, pemakaian dan mula berkuatkuasa.

(1) Undang-undang kecil ini bolehlah dinamakan **Undang-undang kecil Kedai Gunting Rambut dan Pemandan Rambut (Majlis Daerah Setiu) 1988** dan hendaklah dipakai untuk kawasan Majlis Daerah Setiu.

(2) Undang-undang Kecil ini hendaklah mula berkuatkuasa pada tarikh ia disiarkan dalam *Warta*.

2. Tafsiran.

Dalam Undang-undang Kecil ini melainkan jika kandungan ayatnya menghendaki makna yang lain—

"Dandan Rambut" termasuk potong rambut, kerinting rambut, potong-kemas, mencelup, mencukur, mensyampu dan tiap-tiap kerja seumpama itu yang biasanya dilakukan oleh seorang pendandan rambut sama ada dengan tangan, dengan alat, dengan elektrik atau dengan menggunakan apa-apa serbuk atau larutan atau dengan apa-apa komnasi cara-cara itu;

"Kedai gunting rambut" termasuk sesuatu kedai pendandan rambut dan tiap-tiap salun dan semua premis yang di dalam atau di atasnya urusan dandanan rambut dijalankan;

"Larutan disinfektan" ertinya larutan apa-apa disinfektan yang sama kekuatan racun kumannya dengan 5 peratus larutan asid karbolik;

"Pendandan rambut" termasuk seorang penggunting rambut dan (semasa orang itu menjalankan kerja berkaitan dengan dandanan rambut dalam kedai gunting rambut) seorang pekerja pendandan rambut;

"Yang Dipertua" ertinya Yang Dipertua Majlis Daerah Setiu dan termasuk Timbalan Yang Dipertua.

3. Lesen, bayaran dan pemeriksaan.

(1) Tiada mana-mana premis boleh digunakan sebagai kedai gunting rambut melainkan jika premis itu dilesen oleh Yang Di-pertua.

(2) Sesuatu lesen, melainkan jika digantung atau dibatalkan terlebih awal, hendaklah berkuatkuasa sehingga 31hb. Disember berikutan dari tarikh bermulanya lesen itu, tetapi boleh dibaharui pada atau sebelum 31 Disember tiap-tiap tahun.

(3) Tiap-tiap orang yang berkehendakkan lesen atau pembaharuan lesen hendaklah membuat permohonan bertulis kepada Yang Di-pertua.

(4) Bayaran yang kena dibayar bagi suatu lesen hendaklah menurut skel berikut:

- | | |
|--|------|
| (a) Tidak melebihi 3 kerusi penggunting rambut | \$ 6 |
| (b) Melebihi 3 kerusi penggunting rambut tetapi tidak melebihi 8 kerusi penggunting rambut | \$16 |
| (c) Melebihi 8 kerusi penggunting rambut tetapi tidak melebihi 15 kerusi penggunting rambut | \$30 |
| (d) Melebihi 15 kerusi penggunting rambut tetapi tidak melebihi 20 kerusi penggunting rambut | \$40 |
| (e) Melebihi 20 kerusi penggunting rambut | \$60 |

(5) Yang Dipertua hendaklah menyimpan suatu daftar semua permohonan sedemikian.

(6) Dalam masa sesuatu lesen itu berkuatkuasa Yang Dipertua boleh, atas permohonan pemegang lesen itu, membenarkan lesen itu dipindah milik kepada seorang lain.

(7) Tiap-tiap pendandan rambut yang menjalankan perniagaan atau urusan pendandan rambut atau menjaga atau diambil bekerja di premis di mana urusan tersebut dijalankan hendaklah membenarkan Yang Dipertua atau mana-mana orang yang diberikuasa dengan sewajarnya olehnya memasuki premis itu pada bila-bila masa yang munasabah tanpa notis dan memeriksa premis itu dan tiap-tiap bahagiannya dan tidak boleh menghalang atau membenarkan orang itu dihalang daripada membuat pemeriksaan itu.

4. Kebersihan premis dan perkakas.

Premis tiap-tiap kedai gunting rambut, perkakas-perkakas, perabot dan alat-alat hendaklah pada setiap masa disenggara di dalam keadaan baik dan berada di dalam keadaan yang sungguh bersih.

5. Bekalan air panas dan sejuk.

Bekalan air panas dan sejuk yang mencukupi hendaklah diadakan terus menerus di tiap-tiap kedai gunting rambut semasa ia dibuka untuk urusan.

6. Bekas bagi tuala kotor dan buangan tred.

Hendaklah diadakan di tiap-tiap kedai gunting rambut sekurang-kurangnya dua bekas yang sesuai yang bertudung rapat, yang ke dalam satu daripadanya hendaklah dimasukkan semua tuala kotor dan kain-kain kotor yang lain selepas sahaja digunakan, dan ke dalam yang satu lagi dimasukkan semua keratin rambut dan lain-lain buangan tred dengan seberapa segera yang praktik selepas melayan seorang pelanggan.

7. Kehendak-kehendak kebersihan yang mesti dipatuhi oleh pendandan rambut.

(1) Sebelum melayan seseorang pelanggan, tiap-tiap pendandan rambut hendaklah mencuci tangannya dengan sepenuhnya, dengan menggunakan sabun dan air bersih, dan bila perlu menggunakan berus kuku untuk maksud ini.

(2) Tiap-tiap pendandan rambut hendaklah, semasa melayan seseorang pelanggan, memakai kot atau overall yang bersih dan padan berwarna putih atau warna cerah diperbuat dari kain yang boleh dibasuh.

(3) Tiap-tiap pendandan rambut hendaklah menjalani pemeriksaan doktor setahun sekali.

8. Tuala muka yang bersih dan lain-lain untuk seorang pelanggan.

(1) Tuala muka, pelindung leher, tuala leher dan fabrik-fabrik lain yang secara langsung menyentuh kulit seseorang pelanggan hendaklah diadakan yang bersih dan yang baru untuk setiap pelanggan.

(2) Tuala muka hendaklah direndam dalam air mendidih atau diwap selama sekurang-kurangnya 5 minit dan kemudiannya di basuh sebelum digunakan pada tiap-tiap pelanggan.

9. Sabun untuk cukuran.

Tiada apa-apa sabun melainkan sabun cecair atau kerim cukuran atau sebaik cukuran boleh digunakan bagi maksud mengeluarkan buih bagi mana-mana pelanggan yang menghendaki cukuran.

10. Cawan cukuran.

Cawan yang digunakan untuk mengisi air bagi mengeluarkan buih untuk cukuran hendaklah dikosongkan selepas sahaja digunakan bagi tiap-tiap pelanggan dan dicuci sepenuhnya dengan air mendidih.

11. Penggunaan span di larang.

Span atau puff bedak tidak boleh digunakan ke atas pelanggan.

12. Memberhentikan keluaran darah.

Keluaran darah hendaklah diberhentikan hanya dengan suatu stiptik yang sesuai, yang hendaklah digunakan ke atas seorang pelanggan sahaja dan hendaklah selepas sahaja digunakan dimasukkan dalam bekas yang disediakan untuk buangan tred.

13. Penyakit-penyakit berjangkit atau menular.

(1) Mana-mana orang yang mengidap apa-apa penyakit berjangkit atau menular, atau apa-apa ruam atau letusan berjangkit atau menular di muka, leher atau kulit kepala, hendaklah memberitahu pendandan rambut tentang adanya penyakit, ruam atau letusan itu sebelum ia membiarkan kerja mendandan rambut di jalankan ke atas dirinya.

(2) Tiap-tiap pendandan rambut, apabila diberitahu sedemikian atau tanpa diberitahu dengan sendirinya mengetahui bahawa seorang itu mengidap apa-apa penyakit

berjangkit atau menular atau ruam atau letusan berjangkit atau menular hendaklah semasa melayan orang itu, menggunakan alat-alat berasingan yang diasingkan untuk digunakan khas bagi orang-orang itu. Alat-alat itu hendaklah selepas sahaja digunakan direndam dalam suatu larutan disinfektan selama sekurang-kurangnya lima minit. Semua tuala, kain, overall yang dipakai oleh pendandan rambut itu hendaklah selepas sahaja digunakan dimasukkan dalam suatu larutan disinfektan atau dalam air mendidih selama sekurang-kurangnya sepuluh minit.

(3) Seseorang pendandan rambut yang mengidap apa-apa penyakit berjangkit atau menular atau apa-apa ruam atau letusan kulit berjangkit atau menular tidak boleh melayan mana-mana pelanggan.

14. Membasmikan kuman dari alat-alat.

(1) Tiap-tiap pendandan rambut hendaklah menyebabkan semua kelengkapan bagi kegunaan am yang ternyata di bawah ini dibasmikan kuman mengikut cara yang ditetapkan, atau sebagai ganti dengan cara pembasmian kuman yang berkesan melalui diangan lampu ungu yang diluluskan oleh Yang Dipertua:

(a) Pisau cukur, gunting dan sikat – rendamkan selama sekurang-kurangnya tiga minit dalam larutan disinfektan.

(b) Perepang (*clipper*) dengan mula-mulanya memberus sepenuhnya gigi-giginya dengan suatu berus yang bersih dari kuman untuk membuang semua rambut dan kemudian mengesat gigi-gigi itu dengan kain yang telah direndam dalam larutan disinfektan.

(c) Berus rambut – dengan merendam bahagian bulu atau bulu keras selama sekurang-kurangnya tiga minit dalam larutan disinfektan yang sesuai dan kemudian keringkan berus itu dalam ruang udara panas.

(d) Berus cukur – apabila suatu berus baru mula digunakan, dengan merendam bahagian bulu keras dalam 10 peratus larutan formalin selama sekurang-kurangnya tiga puluh minit dan selepas itu bilas dalam air bersih. Apabila hendak digunakan lagi kemudiannya dengan merendamkan bahagian bulu atau bulu keras dalam air mendidih selama sekurang-kurangnya tiga minit tetapi jika bulu keras itu dibuat daripada apa-apa bahan sintetik memadai membasuhnya dengan sabun dan air.

(2) Semua kelengkapan yang tersebut dalam perenggan (1) hendaklah dibasmikan kuman mengikut cara yang dinyatakan di atas sebelum digunakan tiap-tiap hari dan selepas sahaja digunakan ke atas tiap-tiap pelanggan.

15. Meludah.

Tiada seorang pun boleh meludah ke lantai atau dinding kedai gunting rambut.

16. Binatang dilarang masuk.

Tiada seorang pendandan rambut boleh menyebabkan atau membenarkan apa-apa binatang masuk atau berada dalam kedai gunting rambut.

17. Penalti.

Seseorang yang melanggar mana-mana Undang-undang Kecil ini adalah melakukan suatu kesalahan dan apabila disabitkan boleh dikenakan denda tidak melebihi dua ribu ringgit atau penjara selama tempoh tidak melebihi satu tahun atau denda dan penjara itu kedua-duanya.

18. Salinan Undang-undang hendaklah dipamerkan dalam kedai gunting rambut.

Suatu salinan Undang-undang Kecil ini, yang diletakkan dalam frame yang sesuai, hendaklah dipamerkan dengan cara mudah dilihat dalam tiap-tiap kedai gunting rambut dan hendaklah sentiasa dijaga oleh pemegang lesen, pengurus atau orang yang bertugas dalam keadaan bersih, bioleh dilihat dan dibaca.

Diperbuat oleh Majlis Daerah Setiu di dalam mesyuaratnya pada 16 haribulan Januari 1988.

DATO' HAJI TENGKU MAHMUD BIN MANSOR,
Yang Dipertua,
Majlis Daerah Setiu

Disahkan oleh Pihak Berkuasa Negeri di dalam mesyuarat pada 19 Oktober 1988.

[SUK. TR. 1200/355/2; PUN. TR. 70 Bhg.3]

WAN ISA BIN LONG,
Setiausaha,
Majlis Mesyuarat Kerajaan Negeri,
Terengganu

PNMB
PNMB

Copyrights Reserved ©

All rights reserved. No part of this publication may be reproduced, stored in retrieval system or transmitted in any form or by any means electronic, mechanical, photocopying, recording and/or otherwise without the prior permission of Lawnet.



PRODUCED BY
LAWNET
PERCETAKAN NASIONAL MALAYSIA BERHAD